

Urteko 21. igandea (C)

LEHENENGO IRAKURGAIA

Herri guztien artean ekarriko dituzte zuen herritarrak.

Isaias liburutik 66,18-21

Jaunak dio:

«Hizkuntza orotako nazioak
biltzera etorriko naiz;
haiek etorri
eta nire ospea ikusiko dute.
Ezaugarri bat emango diet:
beraien artean bizirik
geldituriko batzuk
nazioetara bidaliko ditut,
Tarsis, Put
eta arkulari trebeak dituen Ludera,
Tubal , Grezia
eta urrutiko herrietara,
inoiz nire berri izan ez duten
eta inoiz nire ospea ikusi ez duten
herrialdeetara.
Nire ospea iragarriko dute
nazioen artean.
Atzerriko nazio guztietatik
ekarriko dituzte zuen herritarrak
zaldi, gurdi eta ohatiletan,
mando nahiz gamelu gainean;
niretzat, Jaun honentzat,
opari gisa ekarriko dituzte

Jerusalemgo nire mendi santuraino,
israeldarrek beren opariak
ontzi garbietan Jaunaren etxera
eraman ohi dituzten bezalaxe.
Hala diot nik, Jaunak.
Eta beraietako batzuk ere
aukeratuko ditut apaiz eta lebitar.
Hala diot nik, Jaunak.

Jaunak esana.

SALMOA

Salmoa 116, 1. 2

R.

Joan herri guztietatik eta ebanjelioa predikatu.

Goretsazue Jauna, nazio guztiok,
ospa ezazue, herri guztiok! **R.**

Sendoa da guretzat haren maitasuna,
beti-betikoa Jaunaren leialtasuna. **R.**

BIGARREN IRAKURGAIA

Maite duena baitu Jaunak zentzarazten.

San Paulo apostoluak Hebrearrei egindako gutunetik 12,5-7. 11-13

Ahaztu egin duzue seme-alabei bezala ematen zaizuen aholkua:

*Ene seme, ez baztertu
Jaunaren zentzarazpena,
ezta adorea galdu ere
agiraka egiten badizu,*

*maite duena baitu Jaunak
zentzarazten
eta semetzat hartzen duena
du zigortzen.*

Jasaten duzuen zuek zentzarazteko da; Jainkoak seme-alaba bezala tratatzen zaituzte. Izan ere, zein seme-alaba ez du aitak zentzarazten?

Egia esan, mementoan edozein zentzarazpen mingarri da eta ez pozgarri; baina, gerora, zentzarazpenaren bidez zaildu direnek haren fruituak jasotzen dituzte: bakea eta bizitza zuzena.

Ea bada, sendotu beso ahulduak eta belaun makalduak, eta ibil zaitezte bide zuzenean, hanka okerra hauts ez dadin, sendatu baino.

Jaunak esana.

Aleluia Jn 14,6

Aleluia, aleluia.
Neu naiz bidea, egia eta bizia.
- Dio Jaunak. -
Ezin da inor Aitarengana joan nire bidez izan ezik. Aleluia.

EBANJELIOA

Asko etorriko dira sortaldetik eta sartaldetik, eta Jainkoaren erreinuko mahaikide izango.

+ Jesukristoren Ebanjelioa san Lukasen liburutik 13,22-30

Jerusalemera bidean zihoan Jesus, igarotzen zituen herri eta auzoetan irakatsiz.

Batek esan zion:

– Jauna, gutxi izango al dira salbatuko direnak?

Jesusek erantzun zuen:

– Saia zaitezte ate estutik sartzen. Egia esan, askok sartu nahi izango dute, eta ezin izango.

Etxeko nagusiak jaiki eta atea itxiz gero, kanpoan geldituok behin eta berriro atea joko diozue, «Ireki, Jauna» deiadarka, baina hark erantzungo dizue: «Ez dakit nongoak zareten».

Orduan, honela hasiko zatzaizkiote: «Zurekin jan eta edanak gara, eta zuk gure plazetan irakatsi izan duzu». Baina hark erantzungo dizue: «Ez dakit nongoak zareten. Alde niregandik, gaizkileok!»

Orduan, negarra eta hortz-karraska izango da, Abraham, Isaak eta Jakob eta profeta guztiak Jainkoaren erreinuan eta zeuen buruak, berriz, kanpora jaurtiak ikustean.

Asko etorriko dira sortaldetik eta sartaldetik, iparretik eta hegotik, eta Jainkoaren erreinuko mahaikide izango.

«Begira, orain azkeneko den zenbait, lehenengo izango da orduan, eta orain lehenengo den zenbait, azkeneko».

Jaunak esana.

Blog: <https://homiliaspagola.blogspot.com/>